



14

Niining Leksyona **Matun-an Mo Kini**


Si Jesus Mao ang Dalan ngadto
sa Amahan

Ang Saad sa Espiritu Santo

SI JESUS MAO ANG DALAN NGADTO SA AMAHAN

(Basaha ang Juan 14:1-14)

Sa pag-ingon ni Jesus ngadto sa Iyang mga tinun-an nga Siya mamatay ug magabiya kanila, sila naguol. Gidasig sila ni Jesus pinaagi sa pag-ingon nga Siya magaandam ug dapit alang kanila. Ug nga Siya mobalik pag-usab ug kuhaon sila uban na gayud Kaniya.




Usa ka importanteng butang nga atong hinumdoman nga si Jesus mobalik pagusab alang sa Iyang mga katawhan. Iyang kuhaon sila uban gayud Kaniya sa walay katapusan. Kini usa ka kahibulongang adlaw ug kinahanglang pangan-daman nato kini. Kon ang atong kinabuhi aduna pay sala dili mokuha si Jesus kanato. Ug kon kita napasaylo na sa atong mga sala ug nagkinabuhi alang sa Dios, nan kuhaon kita uban sa Ginoo.

Juan 14:3. Ug sa mahiadto na ako ug maka-andam na akog luna alang kaninyo, moanhi ako pag-usab ug pagadawaton ko kamo nganhi uban kanako, aron nga diin gani ako atua usab kamo.

Gibalikbalik ni Jesus pag-ingon nga Siya mao ra gayud ang dalan padulong sa Amahan. Wala nay laing paagi nga makaadto sa langit. Kinahanglang magatoo ka nga gilansang si Jesu-Cristo aron pagluwas kanimo ug Siya ra gayud ang makahimo niini.

Juan 14:6. Ako mao ang dalan ug ang kama-tuoran ug ang kinabuhi walay bisan kinsa nga makaadto sa Amahan gawas kon pinaagi kanako.

Gisaad ni Jesus nga kadtong mga nagatoo Kaniya makahimo ug dagkung mga butang kay sa ilang nakita nga gibuhat ni Jesus. Si Jesus maanaa lamang sa usa ka dapit sa usa ka higayon. Apan sa dihang nagadaghan ang sumusunod ni Jesus, silang tanan makahimo ug labaw pa ka dagkung mga butang pinaagi sa tabang sa Dios.



Miingon si Jesus nga kita makaampo diha sa Iyang ngalan (makita sa bersikulo 13, ug 14). Ang pagpangayo pinaagi sa ngalan ni Jesus nagpasabot kini ug pag-ampo sa matang sa pag-ampo nga giampo ni Jesus. Nagapasabut kini ug pag-ila sa kabubut-on sa Dios ug sa pag-ampo sa mga butang nga tukma sa Iyang kabubut-on. Nagapasabot pa gayud kini ug pag-ampo pinaagi sa katungod nga anaa kang Jesus.

Ang mga balatian ug ang mga dautang mga espiritu mokalagiw pinaagi sa ngalan ni Jesus nga may gahum. Makadahum kita ug dagkung mga butang, mabasa nato sa bersikulo 12 kon magampo kita pinaagi sa ngalan ni Jesus. Wala kitay katungod sa atong kaugalingon.

Buhata Kini

1. Sag-uloha ang Juan 14:3 ug Juan 14:6.
2. Giunsa man pagdasig ni Jesus ang Iyang mga tinun-an human Niya suginli sila nga mobiya Siya kanila.
 - . . . a) Miingon Siya nga mobalik Siya ug kuhaon Niya sila uban gayud Kaniya.
 - . . . b) Miingon Siya nga mamatay usab sila ug unya moadto uban sa Dios.
 - . . . c) miingon siya nga sila dili na magakinahanglan kaniya
3. Pila man ang dalan padulong ngadto sa Dios.
 - . . . a) Daghan. Bisan unsang relihiyona magadala ngadto sa Dios.
 - . . . b) Bisan unsang dalana imong sundon insakto kon magmatinud-anon ka.
 - . . . c) Usa ra ka dalan ug kini mao si Jesu-Cristo lamang.
4. Unsa may gisulti ni Jesus mahitungod sa pag-ampo?
 - . . . a) Ang Iyang mga tinun-an kinahanglan moampo pinaagi sa Iyang ngalan ug buhaton Niya ang ilang pangayoon.
 - . . . b) Ang Iyang mga tinun-an kinahanglan moampo pinaagi sa ngalan ni Maria tungod kay inahan man siya ni Jesus.
 - . . . c) Ang iyang mga tinun-an kinahanglan magaampo ngadto sa mga larawan.

ANG SAAD SA ESPIRITU SANTO (Basaha ang Juan 14:15-31)



Sa capitulo 14 ngadto sa 15 ug 16 mabasa nato ang mahitungod sa ginabuhar sa Espiritu Santo ingon nga atong Magtatabang. Ang mga tawo sa kalibutan dili makadawat sa Espiritu, apan ang magtotoo makadawat niini. Siya mao ang Espiritu sa kamatuoran nga nagatabang sa pagsabot sa kamatuoran. Siya nagatudlo, nagatabang ug nagapahinumdom ug nagapasabot kon unsay gitudlo ni Jesus.

Juan 14:16. Ug ako mangamuyo sa Amahan ug kamo iyang pagahatagan ug laing Manlala-ban nga magapakig-uban kaninyo hangtud sa kahangturan.

Miingon si Jesus nga ang atong mga buhat nagapamatuod kon nahigugma ba kita Kaniya o wala.

Juan 14:23. Kon kinsa ang nahigugma kanako, iyang pagabantayan ang akong pulong, ug ang akong amahan mahigugma kaniya, ug moanha kami kaniya ug anha kami mopuyo diha kaniya.

Daghang mga tawo ang nagahunahuna nga ang mga kasugoan ni Jesus malisud. Sa dihang ang Dios ug si Jesus magapuyo uban kanato, Sila magatabang kanato. Pinaagi sa Ilang tabang makahimo kita sa bisan unsa nga Ilang ipabuhat kanato.

Buhata Kini

5. Sag-uloha ang Juan 14:16, 23
6. Unsa may tabang nga gisaad ni Jesus alang sa Iyang mga tinun-an human Siya mibiya.
 - . . . a) Ipadala Niya ang Espiritu Santo nga makig-uban kanila.
 - . . . b) Magaampo Siya alang kanila.
 - . . . c) Makigsulti Siya uban kanila.
7. Unsa may timailhan niadtong nagaingon nga nahigugma sila ni Jesus?
 - . . . a) Moadto sila sa simbahan ug mag-pabautismo sa tubig.
 - . . . b) Magatuman sila sa Iyang pulong.
 - . . . c) Nagahimo silag maayo ngadto sa tanang katawhan.
8. Itandi ang imong mga tubag sa hustong mga tubag nga anaa sa katapusan niining leksyona.
9. Sulati ang imong rekord sa estudyante alang sa ika-14 nga leksyon.

Mga Tubag sa Ika-14 nga Leksyon

Kon aduna kay 5 ka hustong mga tubag markahi ug labing maayo, kon 4 markahi ug maayo, kon 3 ra kasarangan. Kon kubos sa 3 ang imong hustong mga tubag, basaha pag-usab kining leksyona.

2. a) Miingon Siya nga siya mobalik aron pagkuha kanila uban gayud Kaniya.
3. c) Usa ra ka dalan ug kini mao si Jesu-Cristo.
4. a) Ang Iyang mga tinun-an kinahanglan magaampo pinaagi sa Iyang ngalan ug buhaton Niya ang ilang pagapangayoon.
6. a) Ipadala Niya ang Espiritu Santo nga makig-uban kanila.
7. b) Magatuman sila sa Iyang pulong.

Gidaghanon sa hustong tubag —

Grado _____